

史臣曰是政也以驕愚之李樛授諫長之職以邪諂之百鈞置論思之任如是而欲望其袞職之無闕君德之成就豈不難哉夫用人之際注擬之權專在銓曹其任重矣而以通源之嗜利無恥患得患失之人付以是柄無怪乎互相締結而推薦也

丁亥日暈

戊子日暈夜異方如火氣

己丑憲府啓曰來二十五日

奉先殿茶禮後仍齋宿齋室事

已定矣但齋室與梵宇連構齋宿之時僧徒若仍在寺內則異類逼處御所已為未安亦妨清齋靜肅之道居僧等請令先期出寓外處此實行宮內事布營使必處置而日期已迫尚未稟命故敢啓諫院亦啓答曰如啓但陵寢寺內不可盡空晝則盡出於外夜則二三僧守直無妨

辛卯

上幸奉先殿行茶禮後仍齋宿于齋室

殿乃御容所也

壬辰

上具驂布烏犀帶行祭于

光陵如儀○傳于政院曰